

REGLUGERÐ

um breyting á reglugerð um eftirlit með framleiðslu og verslun með fóðurvörur, nr. 187/1974.

I. KAFLI

Áburður.

1. gr.

Framleiðandi og/eða seljandi tilbúins áburðar skal tilkynna Eftirlitsdeild Rannsóknastofnunar landbúnaðarins (RALA) fyrir hver áramót, hvaða tegundir tilbúins áburðar: köfnunarefnisáburðar, fosfóráburðar, kalíáburðar, blandaðs áburðar, — eru fyrirhugaðar til sölu á næsta ári.

Óheimilt er að selja til notkunar aðrar tegundir tilbúins áburðar en þær, sem tilkynntar hafa verið til Eftirlitsdeildar RALA.

2. gr.

Eftirlitsdeild RALA skal gerð grein fyrir samsetningu fyrirhugaðra áburðar- tegunda, þ. e. hundraðshluta þess aðalnæringarefnis eða efna, hvers fyrir sig, sem við kunna að eiga, og er þá átt við þungahlutfall.

Nota ber viðeigandi efnafræðitákn, köfnunarefni sem N, fosfór sem P_2O_5 og kalí sem K.O og K. Í þessu sambandi skal jafnan talað um eingildar tegundir, ef þær innihalda aðeins eitt aðalnæringarefni. blandaðan tvígildan áburð, ef um tvö aðal- næringarefni er að ræða og blandaðan þrígildan áburð, ef aðalnæringarefnin eru þrjú.

3. gr.

Framleiðandi og/eða seljandi tilbúins áburðar skal veita Eftirlitsdeild RALA upplýsingar um, hvers konar efnasambönd sé að ræða í hverri tegund áburðar, og séu fleiri en eitt skal gera grein fyrir, hve mikill hluti aðalnæringarefnis er í hverri mynd. Skýra skal frá uppleysanleika einstakra efnasambanda þannig, að fram komi hlutdeild viðkomandi næringarefnis.

Ennfremur skal greina frá sem næst þeim hundraðshluta snefilefna eða ann- arra fylgiefna, sem óhjákvæmileg eru, eða æskileg kunna að teljast, annaðhvort frá áburðarfræðilegu (jurtanæringarfræðilegu) sjónarmiði eða til þess að auðvelda áburðinn í meðförum.

Gera skal grein fyrir kornastærð einstakra áburðartegunda og því, sem fram- leiðandi telur eðlilegt rakainnihald áburðarins. Taka ber fram, ef um sérstaka raka- sækni er að ræða.

4. gr.

Framleiðandi og/eða seljandi tilbúins áburðar skal merkja umbúðir, sem áburð- urinn er seldur í, á skýran og greinilegan hátt. Þar ber að taka fram: nettóþyngd, tegundarheiti áburðar, hundraðshluta aðalnæringarefnis eða efna, táknuð með við- komandi efnafræðitáknum (sbr. 2. grein). Sé um blandaðan áburð að ræða, skal setja greinilegt þankastrik milli efnafræðitákna einstakra efna. — Á umbúðum skal einnig geta um pökkunarviku og ártal.

Ef tilbúinn áburður er afgreiddur og seldur í lausri vigt, þ. e. án umbúða, skulu samsvarandi upplýsingar fylgja afgreiðslu- og sölunótum.

5. gr.

Heimilt er að senda Eftirlitsdeild RALA sýni til rannsóknar og skal sá, er rannsóknar óskar, bera af henni allan kostnað samkvæmt gjaldskrá, enda sé ekki

um frávik frá yfirlýstri samsetningu áburðarins, rakainnihaldi eða kornstærð hans að ræða. Ef um frávik er að ræða eða Eftirlitsdeildin telur ástæðu til af öðrum orsökum, ber Eftirlitsdeild RALA að senda fulltrúa sinn á vettvang til að annast sýnatöku, og skulu þau sýni lögð til grundvallar formlegri rannsókn.

Sýni skulu tekin með þar til gerðu áhaldi og hverju sýni skipt í tvo jafna hluta strax að töku lokinni og hver hluti innsiglaður fyrir sig í loftþéttu íláti. — Annan hluta sýnisins skal nota strax til rannsókna hjá Eftirlitsdeildinni, en hinn hluta sýnisins skal varðveita ósnertan í a. m. k. 9 mánuði, eftir að rannsóknaniðurstöður liggja fyrir, í því tilvikum að um veruleg frávik frá yfirlýstri efnasamsetningu, rakainnihaldi eða kornstærð sé að ræða og ágreiningur eða mál kunnir að rísa upp vegna rannsóknaniðurstaðna eða úrskurðar Eftirlitsdeildar RALA.

6. gr.

Leyfileg frávik frá uppgefnu innihaldi tilbúins áburðar skulu vera:

N	Plús/mínus 0.5
P ₂ O ₅	Plús/mínus 0.6
K ₂ O	Plús/mínus 0.5 (ef K ₂ O er gefið upp lægra en 20%)
K ₂ O	Plús/mínus 0.6 (ef K ₂ O er gefið upp hærra en 20%)
CaO	Plús/mínus 2.0 (ef um verksmiðjuframleitt kalk er að ræða).

Rakainnihald (laust bundið vatn) má ekki víkja meira en plús/mínus 0.3, nema í ammóníum nitrati skal frávik ekki nema meira en plús/mínus 0.1.

7. gr.

Óheimilt er að selja tilbúinn áburð, sem í hefur verið blandað skordýraeitri, sveppaeitri eða illgresisseyðingarefni, nema með sérstöku leyfi Eftirlitsdeildar RALA, og því aðeins að notkun slíkra efna stangist ekki á við lög eða reglugerðir hér að lútandi.

8. gr.

Varðandi verslun með kalk til jarðræktar skal veita Eftirlitsdeild RALA upplysingar hliðstæðar og með tilbúinn áburð. Á umbúðum og með sölu- og afgreiðslunótum, sé afgreitt og selt í lausri vigt, ber að gefa upp innihald af CaO og CaCO₃. Sé um dólómítalk að ræða ber einnig að gefa upp innihald þess af magnesíum táknað sem MgO og MgCO₃.

Taka skal fram, hvort um verksmiðju-unnið kalk er að ræða, mulið kalk eða skeljakalk (skeljasand).

9. gr.

Gefi rannsókn Eftirlitsdeildarinnar á tilbúnum áburði tilefni til athugasemda, er skylt að gera bæði áburðarkaupanda og áburðarseljanda og/eða framleiðanda þegar í stað viðvart. Jafnframt skal Eftirlitsdeildin hlutast til um, sé þess óskað, að sá er misgert hefur verið við, hljóti viðeigandi bætur fyrir.

10. gr.

Gjald til eftirlitssjóðs vegna áburðareftirlits skal vera 0.1% af heildsöluverði hverrar áburðartegundar. Verði gjaldinu ekki breytt af hálfu ráðuneytisins fyrir 1. apríl ár hvert, skal gjaldið haldast óbreytt til jafnlengdar næsta árs. Áburðarverksmiðja ríkisins innir greiðslu eftirlitsgjalds til eftirlitssjóðs af hendi fyrir 1. október hvers gjaldárs.

11. gr.

Reglugerð þessi nær til hvers kyns tilbúins áburðar og kalks til jarðræktar, sem selt er í lausri vigt eða umbúðum stærri en 10 kg að þyngd.

12. gr.

Heimilt er Eftirlitsdeild RALA að víkja frá fyrrgreindum ákvæðum, ef sérstaklega stendur á, að fengnu samþykki áburðarnefndar.

II. KAFLI

Sáðvara.

13. gr.

Reglugerð þessi nær til þeirrar sáðvöru, sem notuð er til framleiðslu fóðurjurta.

14. gr.

Innfluttri sáðvöru skal fylgja vottorð samkvæmt alþjóðareglum O.E.C.D. Þó getur Eftirlitsdeild RALA veitt undanþágu frá þessu, að höfðu samráði við sáðvörunefnd.

Innlendur framleiðandi sáðvöru skal tilkynna Eftirlitsdeild RALA nafn framleiðanda og/eða seljanda og heildarmagn sendingar ásamt eftirfarandi upplýsingum um sáðvöruna: Plöntutegund, stofn, uppskeruár, grómagn, slæðingsfræ og óhreindi.

Eftirlitsdeild gefur út vottorð um gæði vörunnar með tilgreindum gildistíma. Innflutningur eða sala á sáðvöru er því aðeins heimil, að henni fylgi gæðavottorð frá Eftirlitsdeild RALA.

15. gr.

Sá, sem rækta vill fræ til sölu hér á landi, skal tilkynna Eftirlitsdeild það í síðasta lagi 1. apríl ár hvert, hvað fræ hann hyggst rækta og á hve stóru landi. Eftirlitsdeildin skal fylgjast með ræktuninni, einkum með tilliti til íblöndunar annarra tegunda eða stofna.

16. gr.

Heimilt er að senda Eftirlitsdeild sýni til rannsóknar og skal sá, er rannsóknar óskar, bera af henni allan kostnað samkvæmt gjaldskrá, enda sé ekki um frávík frá yfirlýstum gæðum sáðvörunnar að ræða. Ef um frávík er að ræða eða Eftirlitsdeild telur ástæðu til af öðrum orsökum, ber Eftirlitsdeild að senda fulltrúa sinn á vettvang til að annast sýnatöku, og skulu þau sýni lögð til grundvallar formlegri rannsókn.

17. gr.

Skylt er að láta eintak af gæðavottorði því, sem Eftirlitsdeildin gefur út, með innfluttri sáðvöru og fræi, ræktuðu hér á landi, fylgja hverri sáðvörusendingu (hverjum poka) með nafni tegundar og heiti stofns.

18. gr.

Sáðvörunefnd skal fyrir 1. okt. ár hvert gera skrá yfir þá stofna, sem heimilt er að selja hér á landi án sérstaks leyfis frá Eftirlitsdeild. Vilji fræsali versla með aðra stofna, verður hann að fá til þess heimild frá Eftirlitsdeild. Sáðvörunefnd ákveður, hvort veita skal slík leyfi.

19. gr.

Fræsali skal tilkynna Eftirlitsdeild fyrir 1. febrúar ár hvert hvaða grasfræ-blöndur hann hyggst hafa á boðstólum, hvaða stofna hann ætlar að nota í blöndu og í hvaða hlutföllum. Einnig undir hvaða nafni blandan verður seld. Ekki má breyta hlutföllum né stofnum í fræblöndu nema með vitneskju Eftirlitsdeildar og þarf þá að breyta um nafn á blönduninni. Eftirlitsdeild getur þó veitt undanþágu frá þessu ákvæði.

20. gr.

Til að standa straum af kostnaði við eftirlit með þeim vörum, sem undir þessa reglugerð falla, skal greiða gjald, er nemur tveimur hundraðshlutum af kaupverði (cif.) vörunnar. Gjald þetta greiðist Eftirlitssjóði RALA gegn afhendingu vottorðs.

21. gr.

Reglugerð þessi, sem sett er samkvæmt lögum nr. 53 frá 16. maí 1978 um eftirlit með framleiðslu á fóðurvöru, áburði og sáðvöru og verslun með þær vörur, öðlast þegar gildi. Jafnframt fellur úr gildi reglugerð nr. 53 27. mars 1971.

Landbúnaðarráðuneytinu, 27. apríl 1981.

Pálmi Jónsson.

Haukur Jörundarson.

AUGLÝSING

um umferð í Njarðvík.

Að fengnum tillögum bæjarstjórnar Njarðvíkur og skv. 65. gr. umferðarlaga eru hér með settar eftirtaldar reglur um umferð í Njarðvíkurkaupstað:

1. Njarðvíkurbraut nýtur aðalbrautarréttar gagnvart hliðargötum.
2. Akurbraut nýtur aðalbrautarréttar gagnvart hliðargötum.

Lögreglustjórinn í Njarðvík, 13. apríl 1981.

Jón Eysteinnsson.

REGLUGERÐ

um hækkun bóta almannatrygginga.

1. gr.

Upphæðir bóta almannatrygginga, samkvæmt lögum um almannatryggingar nr. 67/1971, með síðari breytingum, skulu hækka um 8.1% frá og með 1. júní 1981 frá því sem þær voru í mars 1981.

2. gr.

Reglugerð þessi er sett samkvæmt 79. gr. laga nr. 67/1971. Úr gildi fellur reglugerð með sama heiti nr. 127 24. febrúar 1981.

Heilbrigðis- og tryggingamálaráðuneytið, 18. maí 1981.

Svavar Gestsson.

Ingimar Sigurðsson.